

REGLUR

Háskólans á Akureyri um viðurlög við ritstuldi.

I. KAFLI

Skilgreiningar og meginreglur.

1. gr.

Gildissvið og skilgreiningar.

1. Með *ritstuldi* er í þessum reglum átt við þá háttsemi þegar nemandi hagnýtir sér í heimildarleysi hugverk annarra eða líkt og væri eigið hugverk. T.d. með því að afrita beint eða óbeint texta úr ritsmíð annars og setja í sína eigin án þess að það komi fram.
2. Með *hugverki* er í þessum reglum átt við hvers lags áþreifanlegt eða óáþreifanlegt höfundarverk á borð við bækur, greinar, ritgerðir, aðrar ritsmíðar, myndir eða annað jafnt á prenti, tölvutæku formi eða á annars konar formi og tilheyrir tilteknum rétthafa þess.

2. gr.

Almennt bann við ritstuldi.

1. Ritstuldur í hvaða formi sem er telst með öllu óheimil háttsemi í námi við Háskólann á Akureyri og varðar agaviðurlögum af hálfu skólans.

3. gr.

Almenn skylda til að vísa til heimilda.

1. Sá sem hagnýtir sér hugverk annarra í eigin ritsmíð eða öðru hugverki í þágu náms við skólann skal í sérhverju tilviki geta um hugverkið með því að vísa til heimilda.
2. Vísun til heimilda getur ýmist átt sér stað í formi tilvísana neðanmáls, aftanmáls eða með öðrum viðurkenndum hætti á viðkomandi fræðasviði.
3. Deildir skólans skulu uppfæra nemendur um rétta heimildanotkun og um þessar reglur. Sé nemandi óviss um rétta beitingu þeirra heimilda sem unnið er með í skólastarfinu skal leita leiðbeininga hjá viðkomandi kennara.

II. KAFLI

Brot gegn banni við ritstuldi og viðbrögð við þeim.

4. gr.

Brot gegn banni við ritstuldi.

1. Sá sem sannarlega hefur orðið uppvís að ritstuldi af stórfelldu gáleysi telst hafa sýnt af sér hegðun sem er *ámælisverð* háskólafélki.
2. Sá sem sannanlega hefur orðið uppvís að ritstuldi í vondri trú og af ásetningi telst hafa sýnt af sér hegðun sem er *ósæmileg* háskólafélki.

5. gr.

Viðurlög við ritstuldi.

1. Ritstuldur sem jafna má til hegðunar sem telst vera *ámælisverð* háskólafélki skal að jafnaði leiða til áminningar af hálfu deildarforseta og til skerðingar á einkunn fyrir viðkomandi námsþátt samkvæmt mati viðkomandi kennara.
2. Ritstuldur sem jafna má til hegðunar sem telst vera *ósæmileg* háskólafélki skal að jafnaði leiða til áminningar af hálfu rektors og til ógildingar á þátttöku nemandans í viðkomandi námskeiði frá upphafi.

3. Reglur þessar taka ekki til óverulegra mistaka við meðferð heimilda.
4. Ítrekuð brot geta sætt frekari viðurlögum af hálfu rektors, þ.m.t. brottvísun úr skóla.

III. KAFLI

Kærur og málsmeðferð vegna ætlaðs ritstuldar.

6. gr.

Síðanefnd.

1. Við Háskólann á Akureyri skal starfrækt *síðanefnd* sem fjallar um kærur vegna meintra tilvika um ritstuld en í nefndinni eiga sæti 5 fulltrúar úr hópi fastráðinna kennara.
2. Rektor tilnefnir einn fulltrúa í síðanefnd sem jafnframt er formaður nefndarinnar. Deildarfundir háskóladeilda tilnefna sinn fulltrúann hver eða 4 alls, auk varamanna þeirra.
3. Fulltrúar í síðanefnd kjósa varaformann en rektor ræður ritara nefndinni til aðstoðar.
4. Þrjá fulltrúa þarf að lágmarki til að síðanefnd geti tekið ákvörðun í máli og ræður afl atkvæða lyktum máls en að öðru leyti gilda reglur VIII. kafla stjórnsýslulaga nr. 37/1993.
5. Síðanefnd skal halda málaskrá yfir ritstuldarbrott og varðveitir gögn sem henni berast.
6. Síðanefnd skal fyrir 1. október ár hvert skila yfirlitsskýrslu til háskólaráðs um starfsemi nefndarinnar undangengið skólaár, auk tillagna um breytingar á þessum reglum.

7. gr.

Kvörtun um ritstuld til síðanefndar.

1. Kennurum ber almennt að hafa eftirlit með því að ekki sé brotið gegn banni við ritstuldi og ber að beina kvörtun um slík meint tilvik til síðanefndar.
2. Að baki kvörtun skal búa hlutlæg könnun kennara á námsgögnum frá nemanda og skal þeim framvísað ásamt með stöðluðu kæruformi til ritara síðanefndar.
3. Kennara sem beinir kvörtun til síðanefndar ber að tilkynna deildarforseta um málið.

8. gr.

Málsmeðferð fyrir síðanefnd.

1. Síðanefnd skal taka kvörtun um ritstuld fyrir svo skjótt sem auðið er á fundi þar sem fjallað er um málið og skal það þá fá tiltekið málsnúmer til auðkenningar á því.
2. Síðanefnd skal leggja áherslu á að upplýsa mál m.a. með því að óska eftir frekari upplýsingum frá kennara ef þurfa þykir. Áskilið er að haft sé samband við nemanda sem kvörtun beinist að, sem sé þá upplýstur um efni kvörtunar og fái að tjá sig um málið.
3. Að lokinni rannsókn skal síðanefnd kveða upp skriflegan úrskurð. Í úrskurði skal greina frá eftirfarandi atriðum og kaflaskipt í þessari röð:
 - a) dagsetning úrskurðar, málsnúmer, að hverjum kvörtunin beinist og hvenær hún barst nefndinni,
 - b) tegund máls – þ.e. hvert sér umkvörtunarefnið í einni setningu,
 - c) helstu málavextir og málsmeðferð sem fram hefur farið,
 - d) rökstuðningur fyrir niðurstöðu og þ.m.t. hvað telst vera nægilega sannað og hvernig,
 - e) niðurstaða í úrskurðarorði auk undirritunar nefndarmanna sem stóðu að niðurstöðu.

9. gr.

Ákvarðanir og tilmæli síðanefndar.

1. Síðanefnd skal í úrskurðarorði ætíð skera úr um það hvort hin kærða háttsemi teljist sannarlega vera ritstuldur og um það hvort um ámælisverða (gáleysisbrot) eða ósæmilega (ásætningsbrot) háttsemi hafi þá verið að ræða.

2. Sé um gáleysisbrot að ræða skal siðanefnd í úrskurðarorði alla jafnan mælast til þess að deildarforseti veiti áminningu og að viðkomandi kennari virði brotið til lækkunar fyrir viðkomandi námsþátt að tiltölu við brotið en mat á einkunn er ætíð kennarans.
3. Sé um ásetningsbrot að ræða skal siðanefnd í úrskurðarorði alla jafnan mælast til þess að rektor veiti áminningu og að þátttaka nemandans í námskeiðinu verði ógilt frá upphafi.
4. Siðanefnd kemur úrskurðum á framfæri við viðkomandi deildarforseta sem annast nauðsynleg samskipti við viðkomandi nemanda, kennara og við skrifstofu rektors.
5. Málsefni fyrir siðanefnd eru trúnaðarmál hlutadeigandi og ríkir um þau þagnarskylda.
6. Að öðru leyti vísast til gildandi laga og reglna um Háskólann á Akureyri.

10. gr.

Gildistaka.

Reglur þessar skal endurskoða að þremur árum liðnum frá samþykkt þeirra.

Reglur þessar eru settar á grundvelli laga nr. 40/1999 um Háskólann á Akureyri og öðlast þegar gildi.

Háskólanum á Akureyri, 29. maí 2006.

Þorsteinn Gunnarsson rektor.

Anna Þóra Baldursdóttir,
varaforseti háskólaráðs.